



UNIVERSITÄTS-
BIBLIOTHEK
PADERBORN

Universitätsbibliothek Paderborn

Enarratio Epistolæ Prioris Ad Timothevm, Et Dvorvm Capitum secundæ

Melanchthon, Philipp

Vitebergæ, 1561

VD16 M 3167

Et fide non simulata.

urn:nbn:de:hbz:466:1-36308

I. EPISTOLA AD

Nec simul manent hæc duo pugnancia, Actio qua uiolat homo Legem Dei sciens & uolens, Et illa fides quæ est fiducia misericordiæ accipiens remissionem, quia Iusiurandum dicit, Viuo ego dicit Dominus, nolo mortem peccatoris, sed ut conuertatur & uiuat. Oratio copulatiua est, illa est, non fit uiuificatio fide, donec nulla sit conuersio, id est, donec aliquis habet propositum peccandi, Et talia delicta nominantur uisitate peccata mortalia, cum effunduntur Spiritus sanctus & fiducia misericordiæ, & sic lapsi, tunc sunt rei ira Dei, & æternæ mortis, iuxta illa delicta, Propter hoc uenit ira Dei super inobedientes. Nec recipiendæ sunt fanaticæ imaginationes eorum, qui fingunt semel renatos non posse rursus effundere Spiritum sanctum, cum manifestè dicatur 2. Petri 2. Si rursus superantur ab inquinamentis quæ effugerant, sunt eis posteriora peiora prioribus, Item, Qui stat uideat ut cadat, ideo simus uigilantes, ut iusticia bonæ conscientie retineatur, id est, bonum propositum.

Et fide non simulata.

Nec inchoari dilectio Dei potest, nec placent opera Deo nisi precedente fide, Ne autem fides intelligatur tantum de noticia qualis est in

bolis, addit particulam, Ne sit simulata. Est igitur Fides non simulata assensio qua amplectimur omnia dicta Euangelij, & in his promissionem gratie, Et est fiducia acquiescens in Mediatore iuxta eam promissionem. Hæc fiducia, quæ quidem, cum in ueris doloribus consoletur & erigat corda, & quasi ex inferis retrahat, sentiri potest, discernit ociosam noticiam à non simulata fide. De hac fide dicitur: Iustificati fide pacem habemus. Nec aliter intelligit Paulus uocabulum fidei hoc loco, Cumq; sciamus corruptelas doctrine Pauli excogitatas esse, postquam uocabula falso intetellecta sunt, simus diligentes in reuimenda propria significatione, qua retenta, nec obscuritas nec ambiguitas est in Pauli oratione.

Vt autem hæc breuis summa hoc loco intelligatur, mente intuenda est tota doctrina de Iustificatione, uidelicet in uera pœnitentia seu doloribus uocem Euangelij audiri & cogitari necesse est, quæ propter Filium Dei Gratis, non propter ullam nostram dignitatem simul offert hæc quatuor, remissionem peccatorum, imputationem iusticie, Spiritum sanctum & hereditatem uitæ æternæ. Est autem mandatum Dei æternum & immotum de FILIO, Hunc audite, necesse est igitur assentiri promissioni offerenti reconciliationem,

I. EPISTOLA AD

liationem, uidelicet illa bona quæ dixi. Hac fide homo uerè accipit remissionem peccatorum, imputationem iusticiæ, & Spiritum sanctum, & fit heres uitæ æternæ propter Filium Dei Gratias, non propter propriam dignitatem aut merita. Et in hanc sententiam usitata est oratio in nobis Ecclesijs, Sola fide iustificamur. Significat enim iustificari accipere remissionem peccatorum & imputationem iusticiæ, cum qua coniuncta est donatio Spiritus sancti, & hæreditas uitæ æternæ.

Et manifestissimum est ideò de imputatione dici, quia nondū habemus illam totam nouitatem, de cuius transfusione Monachi dicunt, sed sumus isti donata remissione peccatorum, & imputati nobis iusticia Filij Dei, & quasi ea uestiti per imputationem, & tamen uerissimum est simul inchoari in nobis nouitatem, quæ fit Spiritu sancto effuso in corda nostra, & accendente in nobis fidem, & alias uirtutes, & copulante nos filio Dei regnanti ad dexteram æterni patris, sicut dicitur Actorum 2. Dextera Dei exaltatus accepit promissionem Spiritus sancti, quem effudit in nos.

Prorsus etiam reiicienda est imaginatio, quæ fugit hominem tantum initiò preparari fide, postea uerò iustum esse propria dilectione, seu proprijs uirtutibus, ut cum dicimus, Motus calefacit

TIMOTH: CAP. I. 7

Motus preparatio est, postea calore sumus calidi. Sed persona fide recepta deinceps etiam est iusta, id est, accepta Deo ad uitam eternam, non propter proprias uirtutes, quia multum adhuc manet in nobis sordium, sed propter mediatorem sola fide, qua & deinceps habemus remissionem peccatorum, & imputata iusticia mediatoris uestii sumus: Placet autem noua obedientia in reconciliato, hac ipsa confessione precedente, quod adhuc multe magnae sordes in nobis herent, iuxta illud: Non iustificatur in conspectu tuo omnis uiuens, Sed placeat tamen & hac inchoata obedientia propter mediatorem fide.

Hec sepe alibi copiosius recitantur, unde sumatur explicatio longior, Nunc tantum breuiter hac recensui, ut iuniores admoniti sciant Paulum loqui de hac ipsa fide, de qua alibi inquit, Fide iustificati pacem habemus. Et hanc in quotidiana inuocatione & in consolationibus exerceant.

Bona est Lex legitime
utenti.

Recitata summa ingreditur in commemorationem de usu Legis: Nam multi ex Iudeis adhuc somniantes mansuram esse politiam Mosaicam, contendebant ritus Mosaicos necessarios esse.